

Surat Pembaca

Perang dagang AS-China

Analisis implikasi masa depan

Perang dagangan (trade war) di antara Amerika Syarikat (AS) dan China mungkin sedikit reda sesudah persidangan G20 baru-baru ini, namun impak jangka panjangnya masih belum jelas terutama pelaksanaan tarif ke atas barang dan perkhidmatan kedua pihak.

Bukan soal persaingan antara AS dan China semata-mata sebaliknya AS juga meningkatkan tarif barang import dari negara Eropah, Kanada, Jepun, Korea Selatan dan beberapa negara lain. Melihatkan kedudukan Malaysia dari sudut geopolitik dan ekonomi, kita wajar menganalisis implikasi pertikaian AS dan China untuk tempoh mendatang.

Eksport Malaysia pasti terjejas. Setiap negara terbabit dalam rantai bekalan serantau dan global sedang menerima kesannya. Malah, ada pihak akan lebih terjejas berbanding pemain utama perang dagangan ini.

Malaysia mengeksport komponen elektronik ke China bagi

penghasilan telefon pintar, komputer dan produk berkaitan. Produk akhir yang disiapkan dihantar pula ke AS. Jika peningkatan tarif dikenakan AS akan mengurangkan eksportnya, import dari Malaysia yang dibawa ke China turut terjejas.

Pada masa sama, produk eksport Malaysia ke AS juga digunakan bagi menghasilkan barang yang dihantar untuk jualan di China dan Eropah. Sekiranya China dan Eropah mengekan tindakan balas terhadap AS, jumlah eksport Malaysia ke AS akan menurun.

Kajian Pictet Asset Management membabitkan 45 negara mendapati Malaysia di kedudukan keenam dalam senarai negara yang berkemungkinan terjejas akibat perang perdagangan ini. Sebanyak 60 peratus nilai eksport Malaysia bergantung kepada rangkaian bekalan global, berbanding dengan China (40 peratus) dan AS (48 peratus).

Profesor ekonomi Sunway University, Yao Jinlong, me-

nyifatkan trend ekonomi Malaysia akan menurun akibat perang dagangan ini dan jika situasi semakin parah, pertumbuhan ekonomi global ber kemungkinan terjejas dan menurun sebanyak satu hingga dua peratus.

Sejak Januari, AS mengena kan tarif sebanyak 30 peratus ke atas panel solar dan komponen berkaitan, manakala 20 peratus terhadap mesin basuh. Negara itu turut mengenakan tarif 25 peratus ke atas eksport besi dan 10 peratus eksport aluminium bagi semua negara kecuali sebahagian kecil.

Secara ringkas, dunia di ambang krisis dagangan global yang dicetuskan Presiden AS, Donald Trump. Ia menyebabkan satu bentuk tindak balas limpa han (overflow response) yang mengurangkan kadar eksport negara membangun dan keluaran dalam negara kasar (KDNK).

Perkembangan terbaru menyaksikan sedikit petanda positif. Persetujuan antara Trump

dan Presiden China, Xi Jinping ketika persidangan G20 bulan lalu bahawa perhubungan AS-China akan terjalin berpanduan koordinasi, kerjasama dan kestabilan bersama serta kesinambungan perbincangan isu dagangan adalah berpanduan konsep kesamarataan dan hormat-menghormati.

Meskipun ketegangan dagangan dijangkakan reda dengan janji bahawa AS tidak akan mengenakan tarif baru terhadap import dari China, Malaysia dan ASEAN harus berhati-hati. Sekiranya perang dagangan mengakibatkan kegagalan untuk produk masuk ke pasaran AS dan China, ada kemungkinan produk berkenaan membanjiri pasaran ‘third-party’ termasuk ASEAN, mewujudkan keimbangan kepada pengeluar domestik di rantau ini.

Fadhil Rahman,
Pelajar PhD (Ekonomi Perniagaan)
Fakulti Ekonomi dan Pengurusan,
Universiti Putra Malaysia